

(123) *LOTUS GLABERRIMUS*. L. pedunculis brevissimis unifloris, leguminibus linearibus compressis, caulibus diffusis, foliolis obovatis calycibusque glaberrimis. ☉. *Lotus conimbrensis*, *Wild. sp. 3. p. 1390. non Brot. nec Balb.* Patria mihi ignota. Species in hortis confusa cum *Loto conimbrensi Brot.* quem nomine et phrasi sequenti distinguam.

*LOTUS ARISTATUS*. L. pedunculis brevissimis unifloris, leguminibus teretibus gracilibus arcuatis, caulibus diffusis, foliolis ovalibus acutis calycibusque apice pilos 1-4 longos gerentibus. ☉. *Lotus conimbrensis*, *Brot. fl. lus. 2. p. 118.* *Lotus conimbrensis*, *Balb. misc. alt. 24. non Wild.* Hab. in Lusitania prope Conimbram et Ulissiponam, in Gallia australi circa Forum-Julium et in Arduenæ sylvæ limitibus, loco dicto *Ensival*. Flores ut in priori albi cum carina purpurea.

(124) *LOTUS SERICEUS*. L. leguminibus ovatis in capitula subrotunda aggregatis, caulibus erecto-cæspitosis tomentosis, foliis ternatis villis adpressis sericeo-incanis. ☽. Hab. in apricis lapidosis Galloprovinciæ orientalis et Liguriæ. *Lotus tomentosus*, *Rohde, neu. journ. Schr. 1809. p. 42. in not.* *Lotus hirsutus incanus*, *Lois. not. p. 116.* Frutex humilis a basi multicaulis, *Loto hirsuto* valde affinis, sed distinctus caescentia sericea e pilis foliorum adpressis candidisque orta. In horto seminum ope cultus per tres annos ne minimam quidem alterationem subiit; in ipsissimo solo et loco *Lotus hirsutus* habitum characteresque suos servavit.

(125) *LOTUS SESSILIFOLIUS*. L. leguminibus 3-6 capitato-radiatis teretibus glabris, foliolis subcarnosis linearibus basi angustatis canescentibus, stipulis foliiformis, caule fruticoso. ☽. Hab. in Teneriffa, unde semina retulit cl. Broussonet. Species affinis *L. glauco* et cum eo ab hortulanis interdum confusa, sed distinctissima duratione perenni nec bienni, caule fruticoso nec herbaceo, foliolis longioribus et angustioribus, floribus numerosioribus majoribus, leguminibus cylindricis nec isthmulis quasi articulatis.

(126) *LYCHNIS CÆLIROSA*. Hæc elegans species male inter *Agrostemmas* Linnæi seu *Lychnides* capsula uniloculari nostras collocata fuit; habet enim capsulam quinquelocularem. Var.  $\beta$ ., diffusa hic dicta, a *Cælirosa* vulgari differt caulibus minoribus diffuso-procumbentibus apice adscendentibus.